

One gade, on vî bassî èt on bia craus pourcia  
Staurés dins l' rododo què l's-èmwinrneûve à l' fwêre,  
Qui s' dimandin.n' sins manque : « Aler qwè fé véla ? »  
Ni tûzin.n' nin galants ni coméres, faut-i crwêre.  
Tot d'on côp, nosse vèraud s'a mètù à gueûler  
Come s'il aureut vèyu dîs botchîs què l' sûvin.n'  
Avou on grand coutia rûjî, près' à planter !  
Lès deûs-ôtes, tot sbarés, n' compurdint nin l' fèrdin.ne :  
« Aurès' bin rade tot fait d' mwinrner parèy disdût ?  
Por on côp qui l' cinsî tûze à nos, qu'i t' pormwin.ne !  
Dispû l' djoû qu' t'as skèpyî, t'as todi yeû t' pwin cût ! »  
L'ome si r'toûne su l' pourcia po lî d'mander ç' què l' jin.ne :  
« Ti m' vas fé div'nu sot à bwêrler parèyemint !  
Tès deûs soçons, véci, deûs bièsses bin èlèvéyes  
Ti mostèrenut comint viker à môde di djin ;  
Nin pus l' gade qui l' bassî, gn-a nin onk qui moufetéye !  
– Deûs d'méy-cognîs, ê ça ! Ci què l'zî pind au nez,  
S'il aurin.n' por one çans' di tièsse, i l' compudrin.n' !  
Mètans qu'on-z-è mode one, tonde l'ôte come ça s' pout fé,  
Mi, tot ç' qui dj' pou ratinde, c'èst l' salwè sins qu' ça trin.ne ! »  
Mins douvint ç' qu'on pourcia èst capâbe d'adviner,  
Tûzer pwis reflèchi, èt s' dîre qui c'èst s' dêrène ?  
L'ome èt l' couchèt, parèt, li bon Diè l's-a gâté...  
Lès-ôtes si consolenut : « On-z-a tortos lès sènes.»  
À qwè bon s' trèccasser quand t' sins qui t'-y-eûre èst là ?  
Tot l' monde sét bin qu'on djoû on sonerè t' dêrène bauye ;  
Purdans l' tims come i vint sins lèyî on chouya  
Di trècas v'nu nwâri l' plaîji d'avant qu'on nos l' rauye.